

Mientras cu e gerente general Rob Smith ta sorprendi cu e sentencia ultimo

E victoria recién di e operadornan di e casino di Radisson no ta cambia plan di e hotel pa bin cu un operador nobo

Nan ta sigui cu e proceso pa facilita un operador nobo pronto pa e casino

ORANJESTAD – Mientras cu Radisson Hotel ta sorprendi cu e ultimo sentencia di huez riba e caso di e operadornan di e casino, nan plannan no ta desvia y lo continua cu e loke cu nan ta haciendo. Asina e gerente general di Radisson Hotel Rob Smith ta bisa Bon Dia Aruba ayera. E reaccion aki ta bin despues cu diabierna ultimo hues a dicta na favor di e operadornan, revocando e decision anterior pa desaloca e operadornan actual di e casino, entrante 14 di februari 2010.

Manera ta conoci, e intencion tabata pa e operadornan actual di e casino bandona e localidad cu nan ta den aworaki mitar di otro luna, dunando espacio pa un otro operador bin maneha e casino aki. Pero mirando cu e operadornan actual no ta di acuerdo cu e decision di e hues anterior y cu e no ta duna nan espacio pa sigui, a opta pa apela.

E apelacion aki, e operadornan a gana den un veredicto temporario te ora cu e operadornan nan caso contra e hotel tuma lugar den e proximo lunanan. Cu e victoria temporal aki, e ta duna e operadornan mas espacio pa keda y bringa nan otro caso.

No obstante e sentencia aki, Smith ta bisa cu e tin tur confiansa den nan posicon y cu e puntonan di e caso y corte eventualmente lo sostene e decision inicial. “E sentencia aki no ta cambia

esaki” Smith ta sigura Bon Dia Aruba. E unico cos cu e veredicto ultimo aki ta haci segun Smith, ta impacta e fecha cu e operadornan actual mester bandona e sitio. “Nos ta explorando tur opcion pa tin un transicion suave entre operadornan di casino y tin tur intencion di tin un facilidad di casino pa e beneficio di e huespednan di Radisson Aruba Resort, Casino & Spa, cu ta disfruta di e variedad di primera clase y amenidad” Smith ta sigui bisa.

Mes momento Smith ta muestra cu nan ta sinti pa e trahadonan actual di e casino cu ta den un momento di inseguridad awor cu e transicion a sufrí un retraso. “Nos lo continua cu e proceso di cambio y ta traha pa un resolucio hopi rapido” Smith ta bisa finalmente.

E caso aki a bin na lus di dia na November ultimo ora cu e operador a perde nan caso den corte di prome instancia y unda cu e sentencia inicial tabata cu e operador actual no por keda den e hotel y tin cu bandona e localidad pa 14 di februari 2010. Un noticia cu no a cay den bon tera serca e trahadonan mirando cu nan trabou lo ta na peliger net den un temporada halto.

E operadornan a bin dilanti y muestra nan banda di medaya indicando e tempo ey cu nan no tin ningun intencion di haci daño na ningun hende y semper a sa di cumpli cabalmente cu e trahadonan financieramente te hasta den temponan cu cosnan tabata dificil pa e casino. Nan ta spera cu nan por continua dilanti y keda Aruba pasobra nan kier keda y lo purba haci esaki te unda cu nan por.

No ta conoci publicamente ken e operador nobo di casino

lo ta y esaki no a keda divulga tampoco pa e gerente general. Contrario na speculation, no ta asina cu ta gobierno tin cu otorga e operador nobo un permiso pasobra esey ta cay bou di e hotel cu ya caba tin su licencia di casino. Ta mas bien un sublease e hotel ta haci na un operador cu na su turno por opera e casino pa e hotel.



Sr. Rob Smith